

四庫全書

史部

欽定四庫全書

史部

吳興備志卷

三十二

詳校官編修

臣曹振鏞

檢討

臣

德生覆勘

覆校官主事

臣龔敬身

校對官主簿

臣汪日贊

謄錄監生

臣林

李

欽定四庫全書

吳興備志卷三十

明 董斯張 撰

詭徵第二十五之一

許子將墓在豫章郡之四里昔子將以中國大亂遠來
渡江隨劉繇而卒於閭門裏於時漢興平二年也吳天
紀中太守吳興沈李白日於廳事上坐忽然如夢見一
人着黃單衣黃巾稱汝南許子將求改葬因忽不見即
求其喪不知處所遂招魂葬之命文學施遐為招魂文

豫章記

吳興施績為尋陽督能言論有門生亦有理意常秉無
鬼論忽有一黑衣白恰客來與共語遂及鬼神移日客
詞屈乃曰君辭巧理不足僕即是鬼何以云無問鬼何
以來答曰受使來取君期盡明日食時門生請乞酸苦
鬼問有人似君者否門生云施績帳下都督與僕相似
便與俱往與都督對坐鬼手中出一鐵鑿可尺餘安着
都督頭便舉椎打之都督云頭覺微痛向來轉劇食頃

便亡

搜神記

葛玄字孝先丹陽句容人號曰葛仙過武康見一人家病作請正祝妖邪邪附巫者與仙公飲公故不飲而邪妖出語不遜仙公厲聲叱曰奸鬼敢爾勅五伯拽妖邪頭附柱鞭背但聞鞭聲出血流地妖邪伏罪乃止

列仙全傳

江子漚傳有蜃棲其下漚東有葛仙翁祠仙翁恐蜃為患令民間每歲元宵前後家家鳴鼓以壓之其聲若曰葛公在葛公在有見老人行市中形貌甚怪聞元宵鼓

謂人曰吾聽鼓聲輒頭痛不能堪奈何忽不見人以為

蜃精

西吳里語

晉元康初中夜見有人坐武康縣樓上身長數丈垂膝至地縣令會稽賀循知之曰此地本防風氏之國其防風氏之神乎遂立廟於縣東

徵異記

昇明中荊州刺史沈攸之廐中羣馬夜輒躑躅驚嘶如似見物攸之令人伺之見一白駒以綠繩繫腹直自外來圍者具言攸之使人夜伏檻邊伺之俄而見白駒來

忽然復去視廐門猶閉計其踪跡直入閣內時人見之咸謂之怪檢內人惟愛妾馮月華臂上一玉馬以綠繩繫穿之至夜輒脫至枕邊每為失去曉時則還試取看之蹄上有泥後攸之敗不知所在

渚宮故事

沈休文雨夜齋中獨坐風開竹扉有一女子攜絡絲具入門便坐風飄細雨如絲女隨風引絡絡繹不斷斷時亦就口續之若真絲焉燭未及跋得數兩起贈沈曰此謂冰絲贈君造以為冰紉忽不見沈後織成紉鮮潔明

淨不異於冰製扇當夏日甫攜在手不搖而自涼

賈氏說林

吳興俞亮以永明八年補護軍府吏於常眠處聞有羊聲疑為神怪竊于戶窺之見其床下有一羊可高二尺

毛色若丹光耀滿室

續異記

齊豫章王蕭嶷亡後忽見形於沈文季曰吾病未應死皇太子加膏中十一種藥使吾不差湯中復加藥一種使吾痢不斷吾已訴先許還東邸當判此事便懷出青紙文書示文季云與卿少舊為呈主上也俄而失所在

文季懼不敢傳少時文惠太子薨

冤魂記

梁蕭猷為吳興太守吳興故有楚霸王神像在府治廳中猷每祭神與交飲至一斛每酬祀盡歡極醉神影亦有酒色所禱必從後為益州刺史江陽人齊狗兒反衆十萬攻州城猷兵糧俱盡人有異心乃遙禱請救是日有田父逢一騎絡鐵從東方來問去城幾里曰百四十里時日已晡騎舉稍曰後人來可令之疾馬欲及日破賊俄有數百騎如風一騎過請飲田父問為誰曰吳興

楚王來救臨汝侯齊狗兒遂平當此時吳興祈禱于神
數日無驗後乃見侍衛士偶皆泥濕如汗猷後封臨汝
侯故神云

南史

吳郡陸憑少有志行神彩秀徹篤信謙讓家湖州長城
性悅山水一聞奇麗千里而往貞元乙丑歲三月遊永
嘉邁疾而歿憑素與吳興沈萇友善萇夢憑顏色憔悴
曰吾遊至永嘉苦疾將困君為知吾者願托家事萇悲
之又叙舊歡晏語久之因述文章話虛無之事乃謂萇

曰贈君浮雲詩一篇以寄其懷詩曰虛虛復空空瞬息
天地中假合成此像吾亦非吾躬悲吟數四臨去曰憑
船已發來明日午時到此執手而去及覺所記甚分明
乃書而錄之如期而憑喪船至長撫孤而慟賻助倍禮
詞人楊丹為之志具旌神感銘曰篤生府君美秀而文
沒而不起寄音浮雲

通出
記

唐蘓頤為烏程尉暇日曾與同僚泛舟苕溪醉後諷詠
因至道磯寺寺前是霅溪最深處俗相傳云此水深不

可測有蛟螭代為人患頭乘醉步行還自駱駝橋遇橋
破墮水直至潭底水中有人令扶尚書出冉冉至水上

顛遂得濟

廣異記已見郡志古跡此加詳

大厯中有進士竇裕者家寓淮海下第將之成都至洋
州無疾卒嘗與淮陰令吳興沈生善別有年矣聲塵兩
絕莫知其適沈生自淮海調補金堂令至洋州舍於館
亭中是夕風月清朗夜將半生獨居有所亡而不得其
寢俄見一白衣丈夫自門步來且吟且嗟似有恨而不

舒者久之吟曰家依楚水岸身寄洋州館望月獨相思
塵襟淚痕滿生見之甚覺類竇裕特起與語未及遂無
見矣乃嘆曰吾與竇君別久矣豈為鬼耶明日駕而去
行未數里有殯其路前有識者曰進士竇裕殯宮生驚
即馳至館問館吏曰有進士竇裕自京游蜀至此暴亡
太守命殯於南二里許道左殯宮是也即致奠拜泣而

去

宣室志

元和中進士陸喬家於丹陽居有亭沼號為勝境一夕

有叩門者儀狀秀逸請其名氏曰吾沈約也聞君善詩
故來候耳既而呼左右曰召青箱來俄有一兒至年可
十餘歲指謂喬曰此吾愛子也以青箱為名欲繼吾學
也此亦好為詩近從吾與范僕射過臺城相與感舊援
筆立成諷之曰六代舊山川興王幾百年繁華今寂寞
朝市昔喧闐夜月琉璃水春風卵色天傷時與懷古垂
淚國門前

宣室志

崔元亮滎陽人也奕世好道勤於香火常諷誦黃庭道

德經寶曆中授湖州刺史修黃籙齋於紫極宮有鶴二
百五十六隻集降壇上內一隻立於虛皇臺頂周身皎
白朱頂而已紫氣彌亘壇所自辰及酉方散杭州刺史
白居易為讚元亮自是通感彌加精誠一旦於靜室誦
黃庭經度人經執手爐於靜室諷經奄然化去歸葬瑩
陽坐龕中但有手爐法水也

杜光庭神
仙感遇傳

宋熙寧十年湖州知州章惇卜葬母於長興周行累日
無所得夢有二人告之曰頭枕靈山脚踏白蓮惇驚起

待旦而行道問樵夫果得二山尋微路而入忽有廟宇
題曰張李二王惇駭異使葬師視之穴在廟中遂禱以
遷廟之意是夕大雷雨及旦廟已遷於山之東北遂以
葬其母惇為宋之奸臣而鬼亦畏之何耶

西吳
里語

鄱陽高嶠就館於邑宰以無訟堂為學舍池中蓮生花
雙頭丞賈選見之曰此嘉祥也先君大觀二年在吳興
鄉校肄業直廬後產此花守兵白教授率諸生來觀之
折取諦玩葉間隱隱有金書先君姓名三字諸生共致

慶語勉令力學以來歲大魁相期輕薄子翕然笑曰賈
癩子作狀元是天下無士也時正病瘡瘍遍體故云至
秋獲薦送廷對果第一賈名安宅

夷堅
志

雌雄木生沈東老庵左回仙橋東其木一本二幹撐雲
突兀高十餘丈枝葉秀异不辨其為何木也雄者花而
不實雌者實而不花水樂間已朽人伐而薪之其根尚
存回仙橋輪囷玲瓏如卿雲萬態誠奇物也沈偕詩曰
聞說真仙女靈根庇萬家不知其何所指而云然

東林
山志

吳興備志卷三十

欽定四庫全書

吳興備志卷三十一

明 董斯張 撰

詭徵第二十五之二

芮曄初任仁和尉長河堰有龍王廟每祭則有小蛇出
或上香爐或飲於杯往來者謹事之堰歲數壞人以爲
龍所爲芮疲於修築之役一日焚香設奠蛇果出爐上
芮端筭數之曰有功於民者乃得祀龍廟食於此未嘗
有功而歲數壞堰勞民之力爲罪多矣無功有罪於國

法當殺即舉笏斬之應手碎是夕宿於近地疾風甚雨
大木盡拔土人大恐而芮處之自若後卒為名臣云

齊東

野語

太湖漁者陸氏子舉網得蟬如斗大以簪剪其網皆斷
陸怒欲烹之其侶老於漁者曰不可吾聞龜蟹之殊類
甚者必江湖之使也烹之不祥乃釋之蟹至水橫行里

許方沒

陸肱
蟹譜

嗣秀王伯圭為安僖卜宅兆銜哀走數百里惟烏程之

菁山最佳卜之而吉然念力不能致徘徊其處一叟忽前曰官豈姓趙而欲求葬地乎王矍然曰汝何以知之叟曰嘗夢神告我矣指所卜之地以售今寢園是

樓鑰崇靖

憲王
行狀

淳熙間烏鎮西利濟院有道人祝道誠者頗有行誼死之日見夢於鎮人黃岩縣縣丞顧元龍曰我當為公之子但公無家眷於此吾故托生黃岩民項氏家元龍夢覺甚奇之翌日訪之民有項氏婦果於是夜產一男產

婦將就褥時亦夢一神人謂曰所生者非汝子當為顧縣丞嗣於是元龍遂收項氏子為己子以其生於岩邑故名之曰岩及元龍任滿歸其徒又夢神謂曰爾師明日未時歸可至通河橋相候其徒如期而往遇元龍元龍因道其事岩生之日即道誠之死期也岩後仕至禮

部尚書

烏青志

淳熙中有錢三翁者衣衲茹素脅不沾席者五十年俗呼布衲翁時德清建阜安橋屬主其事一夕謂其徒曰

翌朝有餽醬謹視之明日果有青坡村民獻醬二甕探之得銀二笏以充橋費人異其前知常摩挲橋曰此可過五百年寶慶丁亥秋震風凌雨民廬寺觀多壞此橋

屹然中流片石不搖

齊東野語

長興縣有老嫗採桑次被虎啣入深谷中不傷之其虎就將蹲自旦至午嫗告曰某之年邁莫有宿業否今困於此又不食乞大聖念之呼虎為大聖虎遂伸一脚於嫗前看之有一竹籤在爪下嫗曰莫要去耶虎掉尾點

頭似相感之狀。嫗乃為拔之。虎迅躍數四，却啣之舊所，並無損。至夜，置一鹿於門首去。

孫光錄

太湖之間，村民耕耘之暇，多事網釣，以甘口腹。獨沈文寶家，全家好善用錢，買所獲之禽魚，放焉。衆笑其癡。沈獨為喜。後值疫，疾人有夢見疫鬼執旗一束，自相語曰：「除沈家放生外，餘排門並可插旗。」其居民三百餘家皆染疾死者，過半。獨沈全家獲免，後享高壽而卒。

好生錄

劉誠意伯溫元時常館於歸安花城。沈氏每夜有妖化。

一女子來就之劉知其妖結曰汝欲為夫婦必擇日具酒乃可耳因與訂期劉謂其徒曰今日有客來可具酒有待之然其人踪跡甚奇勿窺矚至夜妖果至劉與共酌強之痛飲妖醉先就枕酣睡口中吐出一物精光耀室內劉取而吞之妖驚覺泣曰我養此丹已八百年矣欲得子精氣成上仙耳今為子所食子必為王者師我逝矣然我與子有恩明日可至某所吊我劉次日依其言往焉有一雉死於草莽間劉為瘞之劉自是神智倍

常後果佐太祖高皇帝定天下焉

西吳里語

慈感寺前橋曰湖音水清澈有蚌浮水面吐珠人皆見之每風雨即有蛟龍來攫永樂中夏忠靖治水至湖宿寺中夜有神黑衣白裏率一美女來見公不為動徐訴曰久窳於此歲被隣豪欲奪吾女若得大人一字為鎮彼即懾服不敢動公書一詩與之中有蚌傾心之句神拜領而去未幾公至吳淞江有金甲神來訴曰聘一隣女已久無賴贖大人手筆抵塞不肯嫁請改判公張目

視之金甲神甚怖冉冉而退公因悟曰是矣慈感蚌珠
之仇也牒於海神次日大風雨震電有一蛟死於錢溪
之北文皇方有偵卒報知及還朝問狀對曰此皆陛下
威德百神効靈聽命臣何敢與上甚悅楊文貞請錄付
史館上不許萬厯己亥余游太和至荊州文貞六代孫
現為兵使者對余言如此

湧幢
小品

忠靖全聯貝葉曉翻龍側耳珠光夜吐蚌傾心宿寺
詠也

吳興唐訓科廣嘗得周公謹所著癸辛雜識見載方回
事惡周之薄作一絕句解之其夜夢一丈夫曰吾宋方
回也杭人周密與予有場屋之隙作書痛謗予何以雪
冤二百年後賴有子知我幸終為白之唐唯唯而寤詰
旦有人送瀛奎律髓至實虛谷所編也唐曰此殆方君

報我耳

祝子志
怪錄

閔莊懿入郡齋讀書東楹忽疾風迅雷大雨如注衣領
皆濕移書就西楹未及展誦忽震雷擊碎東楹棟瓦無

一遺者公獲無恙天順癸未公赴會試文場恍惚若有神助公以早投卷不與難二事皆异之

名世
類苑

成化間差錦衣衛官王瘤子下江南取寶湖有陳姓者家有一鐵笛一室中吹之則一室中蠅蚋俱遁為王取

去

西吳
里語

王雨舟名濟湖之烏鎮市人也其父王菊家巨富而性吝無子其家臨市河傍有市橋久廢矣一日有老僧至門以修橋為請怒叱數四其請益堅翁曰汝以市中募

緣吾當為主僧不肯必欲翁一力成之不得已而諾焉
費之百金成焉仍建亭橋側俾僧居之僧戒律清苦時
時與翁往來笑語甚相得也居且十年時翁側室有姪
將就館笑一夕翁夢此僧踉蹌進門徑入閨中翁夢中
大怒追逐遂醒而內室啼聲聞矣舉家大喜天明得外
報云僧於半夜坐化於亭中翁大驚因命其子曰濟蓋
取義於橋也雨舟後官橫州別駕詞翰俱佳亦無子性
坦夷有大度窮極聲色富樂終身與余先君交善此其

所自言也

碧里雜存

湖州凌漢章成化間針術神靈擅名吳浙嘗謂予先子從吾翁曰昔曾於市中見一丐者形軀長大而面惡面頰天生一手掌痕有十餘丐者從之既去問於主人主人曰此丐姓聶父聶某原為司務之官因早朝從行吏失攜笏板怒甚掌其面遂仆地死後家居其妻有娠忽一白日見前吏入門徑入其室已而妻生一子掌痕宛然在面父已心知之矣始能言即有報仇之語比長日

以殺父為事父謹防之幾被其弑者屢矣夫妻相議逃
避竟不知所往其子遂縱酒色為非將家業費盡而為
丐云凌時感其事作詩記之曰平生不信有陰魂丐面
而今見掌痕寄與世間君子道莫教結怨種冤根

上

弘治癸丑湖州俞氏敷演梨園飲客酒罷有二青衣持
燈至曰吾乃嚴尚書府中召汝今夕演戲隨以白金半
錠授之諸優如召從至一大厦雕梁畫棟席間章縫畢
集惟飲食殊不可啖主公命云今夕宜演趙盾故事直

未許鳴金諸優演罷久之未曉復睡一覺乃一古廟試

以白金視之冥錠也或曰國初嚴尚書舊游地也

西樵野記

溪亭嚴公謁選銓曹名次已在知縣推官之列但不知

何地一夕夢其家僮與其兄之僮同舟簞泥相爭蓋湖

人簞以壅桑地者公急乘一採菱圓木桶浮至其所各

量取泥一半而覺比榜出乃素州府分宜縣也

見聞紀訓

正德八年四月二十六日湖州西門外漁人罾內得一

魚長三尺許頭似鮎魚黑身大口無鱗似黑鯉魚四足

二足近腮二足尾如青蛙之足不知何物自是連日大風雨洪水泛溢十二月初六至二十日湖州大雪約共丈許溪河凍冰厚尺餘人船不能行者半月餘

葛記

歸安姚石林先生邦材嘉靖壬午鄉薦時先外祖尚未生也夢人謂之曰君與嚴杰同舉進士注意訪求一日探婿屈驥村入塾中閱童子籍見先外祖名驚异因撫其首曰我安能待乎後果同登又嘗書夢齋牕曰火燒

狗尾幸在庚戌

梅聽錄

嘉靖戊子秋南潯鎮有錢珂者其妻產一男六七日而死以火焚之有骨一片不化因共觀之上有宰相二字長半寸有餘字如圖書刻出陽文四圍復有邊欄端楷

整齊人人傳示

茗記

虞長孺辛巳歲就潘公子聘讀書毘山長孺持齋禮梁皇懺衆戀其誠皆來共禮至夜懺本不收但闔戶而散比明長公子啓戶先入見五色香雲四合驚呼諸弟共視長孺後入猶見一角未散柱棟露積如凝珠衆共嘗

之其味各別長孺所嘗獨淡

快雪堂集

金龍大王姓謝名緒建祠洪上隆慶間大司空潘季馴
督漕河河塞不流司空為文責神河塞如故會司空有
書史以事過洪天將暮遇五伯擒以見神神坐廟內詰
問書史曰若官人胡得無禮河流塞亦天數也豈吾為
此厲民為語司空吾已得請於帝河將以某日通矣若
掌書不敬當罰書史訴不得受扑去以告司空已而河
果以某日通於是司空祇事不敢不虔

馮元
成集

湖州董尚書潯陽公得姑蘓某家山石高五丈連巨舟
載歸至震澤舟沉墮水中公募善泅者摸石盛在一大
石盤止盤可合五人抱公甚駭异命數百人次第皆起
之而以石置盤孔毫末湊洽盖即當時以盛石者而某
家亦不知其所始

耳談

餘干李公頤為湖州守前守有卒於官者久而為厲前
後太守率避中堂不敢居然無如之何李至處之不疑
居數日怪輒出李有所見亟命洒掃一室四圍封護極

密止留一戶出入乃盛具筵室中招之是日李盛服具
賓主禮望空酬對揖讓就坐對飲久之李忽出戶即隨
手反扃以泥塗隙處而以太守印章封之數重嚴戒家
人不得開自此終李之世怪不復出

塵餘

金澤寺側有葉販者嘗遊寺中見一羅漢背有一孔手
探之得金字金剛經一卷持之吳門識者曰此松雪真
跡也即以二十金買之販者乃悉破羅漢背取之遂成
富室忽患痢脫肛蹲踞田畔有猛犬忽來銜其肛拖出

腸而死佛亦有靈哉

雲間
雜記

吳興備志卷三十一

欽定四庫全書

吳興備志卷三十二

明 董斯張 撰

匡籍譌第二十六

羣書互閱頗有郢書張輒為是正之不敢依違曹茲
來學獲罪先達無讓焉

南史

四則

沈麟士隱吳差山時人語曰差山中有賢士張按郡志
德清有吳羗山羗漢世寓公也以羗為差當正

沈重字德厚見後周書李云子重悞

顧歡吳郡鹽官人李以為吳興人悞

庾信封武康縣侯見後周書若梁書庾肩吾未嘗有此
封也南北史於其父子並云封北悞矣古詩所又獨歸
肩吾緣不取四史合觀之故

舊唐書

三則

德宗紀以湖州刺史常袞為福建觀察使誤張考袞傳
云袞再貶為湖州紀誤寫耳

錢起云吳人孟郊云洛陽人誤

衢按姑蘇志載錢起仍其悞也

姚思廉陳叔達徐齊暉徐堅沈傳師皆不書吳興人誤
姚陳徐皆自吳興入關沈自吳興徙吳

新唐書

則一

宰相世系表以姚思聰為武康姚最子誤張按獨孤及
秘書監姚子彥墓志云其先馮翊蓮勺人也至高祖僧
洪徙家河東祖思聰秘書少監父坦汝州梁縣丞子讀

後周書最父僧垣非僧洪則南仲裔本吳興而思聰自河東產非最子也當以誌碑為証

勞志亦仍其誤云姚之在吳興者皆思聰後云

宋史

五則

俞汝尚孫侯敷文學士史以侯為倅誤

侯字居易其非名倅審矣

葉清臣自烏程徙吳中不書自烏程誤

李心傳寓湖州史以為湖州誤詳寓公徵

高文虎平江府吳興縣主簿誤當作吳江

莫汲字子及莫濟字子齊莫澄字子登則莫濛字子蒙
無疑宋史新編從宋史刪出作子國誤然無龜齡集如
此亦不敢妄出已臆也

真西山趙正惠希懌墓志云子三人與懋與懃與憲宋
史希懌與憲各傳一曰燕王八世孫一曰燕王十世孫
源流昧而世次乖柯氏新編附與憲於與懃亦不倫

希懌子又有與憲為寧宗所召立為皇太子改名詢
西山不之及有所避也孟至孟屋孟奎括蒼彙紀稱

與愿子談志稱與愿子

陳涇通鑑續編

一則

宋景定四年遣謝奕買田湖州張按癸辛雜識知郡謝奕燾也作謝奕誤

文獻通考

一則

考云陳舜俞嘉禾張按令舉烏程人罷官歸遷居秀之白牛村詳宋史吳興其粉榆也馬氏所載殊誤大明一統志亦誤仍之

續文獻通考

四則

唐棣宜興人棣作扶宜興作吳興悞

道學考

沈文季作沈文考

誤法考

宗廟考云守吳興守劉太和有惠政立生祠於烏程學
內張按郡乘及諸書俱未聞劉太和者明正德間劉莊
襄公天和實稱吾湖循吏通考誤以天和為太和耳
劉燾善書山谷稱之曰羊欣復生考以為劉誼誤

太平御覽

五則

御覽引會稽典錄沈震烏城人按郡國志未有以烏城
名者烏程東漢順帝以前屬會稽郡烏城必烏程之轉
誤也御覽所傳僅錫山本舛漏殊甚如邱靈鞠亦云烏
城人沈宗徠乃云吳國太守陸納之誤為吳納孝義
吳達之誤為吳達不可縷述姚叔祥云秀水好事家有
宋世所藏御覽千卷特精妙只少七卷如覓得一奇狀
也

顏魯公集

一則

吾烏程及福清俱有黃蘗山江淹為建安吳興令故有
遊彼山詩自杼山碑有即淹賦詩之所語而談氏之志
因之不觀其首云閩雲連越邊近得福州志為正其譌

元衡

吳興太守歷官記

一則

周文育子寶安孫碧守吳興者僅寶安而兼及文育與
碧又以寶安為碧子俱悞辨在官師徵

杭志亦
仍此

大明一統志

三則

到仲舉以為陳仲舉武康人悞又名官人物兩見尤可笑

包融陸龜蒙沈括俱以為郡人悞別有辨

錢廣晉吳興長城人與平陳敏亂志云宜興人悞

浙江通志

五則

何叔度何敬容並吳郡太守云吳興悞

戴顓知歸安志以顓為融悞

常璩見宋史璩作懋誤姑蘓志勞浦唐三志武康志並誤

陸龜蒙吳興郡佐寓長城志云郡人誤

危榘知潮州見宋史志云知湖州誤

勞志

十二則

志云元仲景遷吳興太守張按梁書元景仲非仲景也
今正之

志云陳仲舉長城令按陳到仲舉非陳也今正之

吳興八絕只菰城姬曹弗興兩人吳興產耳考陳壽志
及張勃吳錄吳範上虞人趙達河南人皇象江都人劉

惇平原人嚴武彭城人惟宋壽未詳此云吳範皇象福增鄉人劉惇松亭鄉人趙達長興人嚴武宋壽震澤鄉人不知何据惇作淳亦誤

沈鄴宋書自叙鄴字有邑旁諸生皆作豐非也又陵墓條云漢有尚書令禮墓金鵝山沈氏漢時止四墓一海昏侯戎一海昏長子尚書令鄴一海昏少子河間相景一景子荊州刺史彥

志云八聖寺梁青州節度使沈子真捨宅張按節度之

名昉於唐今正刺史

水晶宮本唐刺史楊漢公詩漢公字用又志云楊傑字次公誤次公號無為居士與東坡遊宋也未嘗守湖也沈君諒武后相見唐宰相世系表志云君亮誤

黃龍光三字山谷書見輟耕錄癸辛雜識徐氏掌故勞以為蘇仙書誤

文同元豐中出守吳興至宛邱驛忽留不行沐浴衣冠正坐而逝未嘗屈仕也志混入名宦誤

談志載歸安南園記碑吏部侍郎萬鍾家世錢塘卜宅
橫塘之上洪邁為作記其人慶元時人也勞志以為宋
季人且云國勢日危致仕家居元世祖三徵之卒不應
以流寓為郡人以寧宗為季葉又以吏部侍郎為待制
一事而三誤矣

沈括居錢塘見宋史及王安石撰括父沈周墓志曾鞏
撰括母壽昌許太君墓志其集名長興以括嘗封長興
開國男也志以為郡人唐志以為武康人蓋据安石志

中括四世祖從武康徙杭耳

文獻通考云括之父曰周邁之父曰扶扶之父曰同
皆以進士起家官皆至太常少卿王荊公集樂安程
太君二志文通及遼銘其伯父振之墓可考志以振
亦郡人誤

莫君陳子不知凡幾而其孫命名各由伯以及仲砥子
仲虛仲珪觀談志進士表莫柯下注祖仲珪父漳可見
勞志謂豫漳為伯虛子並未詳談於砥傳末注孫濛字

義也如磻孫澄非伯鎔子亦別提出意其父必以仲名
笑仲珪官侍郎著修行淨土法名後序見樂邦文類

談志

四則

晉太常殷融誤以為齊吏部尚書宋寧朔將軍邱珍孫
誤以為梁太守並正之

見陵墓類

陸修靜志以為德清人誤

烏程令萬彧志以為萬城誤

胡仔同父舜陟叔舜申寓湖談不言其流寓浦直言烏

程人誤

浦志

八則

志云知州事王回字深甫張按宋有三王回一字深甫
閩人一字景深仙遊人皆神哲二廟時人此則南渡後
又一王回字亞夫瑞安人見楊誠齋集非閩產也

知州事王信字公亮誤張按公亮太原人宋初驍將屢
立戰功此麗水人王信字誠之宋史可据也

吳興舊志園第條載崔元亮故宅在長興縣西崔灣元

和中為吳興刺史因家焉浦志亦同黃志則曰湖州刺史崔植籍我崔元亮字晦叔歷湖曹二州後為虢州刺史卒歸葬滏陽並無家於長興之說又考崔植字公修京兆人長慶初為宰相不曾出守湖州及查藏衍舊志云崔祐甫之後有居邑崔灣者家藏韓愈所作祐甫墓銘又藏崔述崔植誥勅數軸理或然也

以下三則見顧應祥長興志辨

証

宋末趙卯發權通判池州元兵渡江池守王起宗棄官

去卯發攝州事繕壁聚糧為守禦計及元兵臨城都統
張林已降卯發知不可守謂其妻雍氏曰城將破吾守
臣不當去汝先出走雍氏曰君為命官我為命婦君為
忠臣我獨不能為忠臣婦乎乃散其家貲與弟姪僕婢
悉遣之書几上曰君不可叛城不可降夫婦同死節義
成雙與雍氏縊死於從容堂已延入問太守何在左右
以死對嘆息為具棺衾合葬祭其墓而去志因誤以節
義成雙之詩為安吉太守趙良淳所作浦志遂謂趙良

淳同妻雍氏縊死於集芳軒夫以卯發詩為良淳所作已誤矣以卯發妻為良淳妻使雍氏有知寧不忿於地下乎故特為之辨

吳貴歸係孝豐魚池鄉人其父貴州當軍娶貴州婦生子帶回故名貴歸今其族裔甚繁即孝豐吳家也所据之山在吳氏相近西吳里語謬載正統十三年長興吳貴歸與安吉梅富作亂浦志又謂永樂十二年安吉梅富二長興吳貴歸合黨謀亂陽武侯薛祿帥兵討平之

皆不考其實且安吉州志明載永樂間魚池鄉吳貴歸
作亂長興安吉相繼騷動又與梅富生不同時今改正
吳均傳云刺史柳惲辟為主簿誤按太守為刺史創隋
唐間前此無是也

浦志及歸安舊志咸淳十年狀元為趙良健按宋史則
王龍澤也且勞志進士表止於七年浦唐當為施憲副
儒姥溪叔祠疏誤耳

元

張稚通有勝國歸安志係抄本借丁長孺而不及索

衢托友人訪之亦無以應此書若在必多逸事而兩
狀頭豈誤至此乎識以寓慨

舊志紹定二年狀元黃朴歸安人福州志云侯官人癸
辛雜識亦云是科省元陳松龍狀元黃朴皆福人故真
文忠回黃啟云鰲頭並出於九仙

元衢

癸辛雜識云張先天聖八年進士志云康定不知康
定無開科之歲也以宋史及各郡叅之自明

元衢

唐志

二十
則

沈約宋書元嘉十九年白龜見餘杭吳興太守文道思以聞今第一卷云元嘉十年素道思誤

郡守杜孺休作杜孺林盛申甫作申輔誤

郝鑒元湖州摠管志中附安定墓下作郝鎰誤

宋道判陳能千見建寧府志志作陳能誤

江淹建安吳興令非茗也混入誤江秉之作江原之誤余端禮烏程令見宋史志以余為俞誤

梁沈浚殉侯景之難志以為浚誤同時有一沈浚在南

史文學傳志混為一人耳

吳喜臨安人卜天與餘杭人臨安餘杭南宋俱為吳興
今刪之

沈重大同八年為博士入後周定鍾律志云天監中誤
陳夷行志云長興人張考諸書及勞浦二志並不載唐
宰相世系表云潁川陳忠不知所承忠即夷行父也志
何据而入之按姚崇自吳興徙陝不踰五世自陳亡至
武后不踰百年獨不可援沈括例志之乎捨元之而入

夷行殊不可解

施延字君子沛國人見後漢書順帝紀及太平御覽海
鹽志當時或寓吳興非郡產也唐仍勞志之誤當正
何臬仙井人志云郡人誤

景定二年榜首方山京見宋史新編志以為方嵩誤勞
志以為方景亦誤

政和八年進士嘉王榜按文獻通考時朝廷以帝胄不
可先多士擢第二人王昂為首志以嘉王為王嘉誤八

閩通志以為重和元年

寺觀類載恭惠王趙澧誤按秀王師揆贈太傅澧王謚
恭惠見宋史

古蹟類孔姥墩以姥為老誤

陵廟類載漢禮部郎中錢敞誤漢世但有尚書郎字文
氏始設禮部之名唐神堯初置禮部郎中兩漢無此官
制也

學校類載安定書院魯紳記按勞志安定書院夫子燕

居堂碑銘江浙叅政富珠哩翀撰今正

志云令狐絢守湖州有惠政按新舊兩唐書絢為奇章
黨人擠衛公不遺餘力其節度淮南時懦緩不為備賊
龐勛偽降絢信之請假勛節鉞勛乘間擊絢大破之絢
之出將入相乃爾可發一大噓又廣閱郡乘自談鎬而
下數種並不言絢在湖有惠政乃新志別得之千載後
乎此段殊不可解

孟之縉妻趙氏名孟桂後為尼改名妙惠見癸辛雜識

志云名妙惠誤

掌故集

十六則

周喬傳王誕誤當作廣陵王誕

索玄璜即袁秀字也集兩出似屬兩人誤

顧憲西陵增稅議當入田賦考入宦業誤

張搏為湖州刺史見新唐書談志云自中大夫拜徐云
志以搏列在太守或自郡丞遷授何耶張按唐書職官
志諸州有別駕一人長史一人司馬一人通典云至唐

而郡丞廢矣唐書陸龜蒙傳亦僅云搏辟以自佐何據
而以陸為郡丞耶

按詩話總龜云磁湖鎮道士磯在楚中西塞山下薛能
西塞山詩西塞收雲盡南湖片月斜宋書臧質敗走南
湖以荷自蔽即此地也徐以為磁湖鎮道士磯並在吳
興誤藝文載陶峴詩亦誤峴作現誤中之誤事見甘澤
語載太平廣記第四百二十卷

吳柔勝空城人初妻某氏生源泳流寓新市再妻吳興

沈氏生淵潛其後淵之子復歸宣州今甲子孝廉吳休
明柔勝後裔也自柔勝至休明十四世譜載甚詳故新
市有狀元橋可據潛臨歿有湖州生循州死數語長谷
公何據而改宣城為溧水且謂柔勝未嘗寓湖淵潛非
新市產耶

凌懋翁安吉人以為歸安誤

程邵烏程人以薦入官以為歸安進士誤

姚昌言靜海人姚鉉合肥人唐文粹序中云云志郡望

也徐云吳興人誤

愚齋集林靜所著見宋潛溪集徐云沈覲誤

唐施肩吾之為湖人掌故據晁公武讀書志載之嚴州志謂肩吾分水人與同邑徐凝同舉進士學仙隱洪以書招凝莫知所終其裔施憲家藏及第告身題鄉貢進士施肩吾年三十五歲注睦州分水縣桐峴鄉寶城里身為寄客習禮記雜文時務策據寄客二字當從吳興遷耶

安吉太守趙公雙節之碑已辨誤在浦志

萬歲歷云太和中烏程閣下生蓮花張按太和晉廢帝紀年也徐以為唐憲宗且傳以臆說不知憲宗紀年元和也今正之

宣和二十八年蘓湖大水誤按宣和僅七年耳考宋史湖秀諸州饑在紹興二十九年徐誤以紹興二十九年為宣和二十九年今正之

卞山楚王神廟梁簡文帝作碑徐以為事佛不殺乃楚

王英非項王也張按南齊書吳興有項羽神太守到郡必祀以軋下牛李安民奉佛法到郡不與神牛云云今簡文碑中所稱楚王弘茲釋教止獻車牛者正指李安民事也徐何据而以楚王英當之耶

倪偁見文獻通考徐以偁為稱誤

西吳里語

則十

後漢抗徐封烏程東鄉侯范曄書附度尚傳里語誤以為度上封當正之

孟東野送從叔簡東歸詩載文苑英華里語云歸吳興
何据簡平昌人常州刺史見唐書非茗人也唐人大都
崇郡望是以有從叔稱耳

唐詢字彥猷湖州守此云唐詢彥名與字混為一又少
一猷字誤

李商隱西亭詩不指地此云湖州西亭誤

施宿之父元之歷左司諫見渭南集此云宿官司諫誤
南齊書王僧孺傳虞義會稽人卒於晉安王侍郎邱國

賓吳興人里語以邱國賓為晉安王侍郎大可笑張又按晉安閩郡名也宋晉安王子勲齊晉安王子懋可証里語乃以為晉之安王更可笑

丁度知湖州民有抵茶禁者受千錢代鞭背此云盛度宋史兩人同傳恐誤憶耳

釋通惠即贊寧兩出誤

彭祖丁令威廬頗伍員荆軻蘭相如蕭何嚴光石崇毛寶王僧辯狄仁傑俱云吳興人此何異盲婦弄琵琶演

小說耶

後周書樂儁異遜湖州刺史按後魏廢帝元年以南襄
州為湖州天和二年省洞州入湖州取楚洞庭為義非
苔也里語混載之誤

後周席固薛慎皇甫道周俱湖州刺史姚僧垣贈荆
湖二州刺史不獨樂異二人也

長興志

二則

陳夷行悞入已辨在郡志

趙卯發見宋史志以卯為昴誤

宋德祐初元兵入四安鎮鎮將吳明死之志云陳明誤
趙昂發作邛發亦誤

臧衍長興志

則一

通鑑魏有安州刺史鉗耳康賈姓氏英賢傳梁天監初有
鉗耳期陵自河南歸化父同祖光並仕魏為三品隋書有
九門令鉗耳文徹唐書有鉗耳大福廣異記有竺山縣丞
鉗耳含光北史後梁蕭綜嫁從父妹於鉗耳氏蓋夷姓也

唐長興令鉗耳知命藏以鉗耳為姓名知命為字可笑

德清志

一則

紫極觀沈道思所捨宅見勞志志以為文道思誤張按
吳興劉宋時相繼有三守一文道思一沈道思一袁洵
字道思每易淆誤故特表出之耳

安吉志

二則

表說友建安人寓茗中志以為安吉人誤

胡長孺汲仲金華人志云胡碭山人誤

茗雪野史

王道隆
一則

沈炯亡身事仇王譏之良是然初明自內南還為陳世聞人卒謚曰恭子王云卒受顯謬不讀史之尤也

峴山志

一則

衢按勞志寶元中滕宗諒于南國立五亭慶厯九年馬尋常宴六老於此以宋寶元為唐寶厯以宴客之馬尋即為宗諒俱誤

烏青志

二則

烏重脣見唐書志載烏贊傳云仲脣當以唐書為証索
度明王廟碑云孫氏世居湖郡考陳壽書堅世仕吳家
於富春堅初封烏程侯其後皓亦封烏程未聞為郡人
也張按漢世富春尚隸吳郡碑中湖字當為吳字無疑
志又載索靖廟碑云孫權為張伯英之出尤誕謾不足
據即如利濟院張循王香火院今遂謠以為睢陽矣
三高祠祀蘇子瞻米元章陳賢良也嘉禾圖經桐鄉志
並以賢良為簡齋曾祖又大誤張按今舉烏程人簡齋

則洛中八俊之一宋史犁然在未窺史籍輒紀輿圖
寧免旁觀者也

書錄解題

一則

方勺嫠人詳泊宅編及吳思道集直齋云嚴瀨人徐長
谷亦仍其誤

朱襄陽志林

一則

志林云蘇養直紳之後頌之族也殊可笑按頌即紳子
也頌元祐中執政養直與其父堅俱從東坡遊若養直

為紳之後則堅與頌實昆弟行頌其伯叔也稱親姪為
疏族可乎

七修類藁

二則

周密號泗水潛夫因霅溪合四水為一也更四為泗謂
出山東魯縣誤又前有沈宋後有錢郎郎謂郎士元也
以周郎等列之亦誤

史書佔俾

一則

南渡初尚書左丞葉夢得居弁山因號石林据水東曰

記載其所撰譜稱曾祖綱葬蘇州寶華山遂為吳郡人
則宋史似非誤若與真西山同時撫州守秘書丞葉夢
得自貴溪遷金谿石門別號是齋建石林書院性理大
全引石林葉氏即斯人也胡元瑞乃地曰松陽官曰尚
書且以二人皆徙湖州誤矣天聖間進士兩張先俱字
子野其號張三影年八十二者湖州人其僅善筆札年
四十八者博州人乃謂俱能詩俱壽考至歸三影於博
何讀齊東野語及歐陽公集函莽至此甚矣著書之難

也

碧里雜存一

則

碧里雜存載成化間宮人周氏一詩云烏程周溥之姊
溥以貢士至別駕考郡志貢士表無溥名以孝廉為別
駕者沈溥也烏程新志載沈大姑事甚詳又載宮詞二
首王氏耳談以為永陵沈太妃所作亦誤

春渚紀聞一

則

何蘧以余拂為南宮魁按馬端臨通考云元符三年進

士省元狀元皆李釜紀聞云余拂誤

北夢瑣言

一則

沈詢傳師子也孫光憲云沈侍郎亞之子也亞之官不至侍郎又一事而兩誤矣

道山清話

一則

宋有兩張先俱字子野三影吳興人其一開封人孝章皇后戚黨歐陽公銘其墓者也見玉照新志清話云即三影誤

史記正義

則一

吳太伯世家云中國之虞滅二世而夷蠻之吳興正義引杜預曰吳興烏程縣南也按子長之意謂虞滅而吳始興耳張守節遂以吳興郡名附會之大可笑

函史

則二

吳澄傳附宇文諒按宇文子貞名公諒以公諒為諒誤長卿可稱曰司馬相耶史崇簡然字句有必不可刪處此類是也

陳樞仕尚書員外郎見曾鞏志鄧直以為尚書誤南畿志亦然

松雪齋集

二則

先侍郎阡表女孟艮集誤作孟銀松雪有手書今玄宰先生勒之鴻寶堂帖中可据也觀堂記澧王師撥誤撥當作揆此集在大同府署中謠字特多吾郡倘有同調刊之吳中足為水晶宮吐氣

道園學古錄

三則

牟隆山墓志云祖子才諡清惠按元史及黃潛隆山集序俱云子才諡清忠當以史為正誌又云應龍字伯成按潛序及戴表元壽席詩序云字成甫虞公偶誤書耳元史亦然

開國功臣錄

一則

辛丑歲十月張士誠趨長興劉成擊敗之禽其將宋元帥及甲辰十日又云獲其元帥宋興祖何耶今刪其一存甲辰所獲之名

崇德志

則

志稱時檄長于識鑒嘗擇婿得湖州張孝祥後及第為
時名士按宋史孝祥烏程人唱第後曹泳揖于殿廷以
請婚為言孝祥不答又按萬姓通譜喻樗有二女富人
交請婚不許及見汪洋張孝祥曰佳婿也遂以妻之以
樗為檄何据兩浙名賢錄亦仍此誤

太平府志則

胡仔舜陟之子績溪人寓吳興以蔭入仕宋史徽志及

浮溪集可証志以為當塗人且云崇寧五年進士俱誤

氏族大全

則一

沈光號肉飛仙隋亡歸唐張按隋書光復仇殉化及之
難楊氏忠臣也何緣歸唐耶

萬姓統譜

則一

沈戎說降劇賊尹良封海昏侯辭不就見談志譜以尹
良為烏程人封海昏大誤

東林山志

則二

薛昂杭人諂事蔡京躡尚書左丞嘗誤呼京名自掌其面見宋史志云里人誤

志云孟淳太平總管按守太平者淳父之縉也志誤

劉鳳吳釋傳

則一

端師子居吳山之解空院乃長興之吳山傳屬之姑蘇誤

陝西通志

則一

沈下賢居烏程小敷山見杜牧之垂吊詩自晁公武誤

云長安人而志亦列之藝文矣

廣西通志

則一

銓胡銓封事者宜興進士吳師古見宋史志易為吳興誤

臨川集

則一


沈邁封長興縣伯見西溪集臨川以長興為長安誤

南豐集

則一

壽安縣君錢氏墓志云曾祖考宣德軍節度使湛誤湛

當作倦見宋史



吳興備志卷三十二